

PARLIMEN MALAYSIA
PEMBERITAHU PERTANYAAN DEWAN RAKYAT

PERTANYAAN : BERTULIS

DARIPADA : DATO' ABDUL MANAN ISMAIL [PAYA BESAR]

SOALAN : Dato' Abdul Manan bin Ismail minta **MENTERI PERTANIAN DAN INDUSTRI ASAS TANI** menyatakan setakat mana Kerajaan merangka dan melaksanakan inisiatif meningkatkan bekalan makanan melalui Projek Berimpak Besar seperti Taman Kekal Pengeluaran Makanan, Zon Industri Akuakultur, Ladang Kontrak dan Pembangunan Usahawan Tani serta Entry Point Projects di bawah NKEA Pertanian bagi menangani kenaikan harga bahan makanan.

JAWAPAN

Tuan Yang Dipertua,

Kerajaan melalui kementerian Pertanian dan Industri Asas Tani telah merangka dan sedang melaksanakan beberapa inisiatif bagi meningkatkan bekalan makanan melalui beberapa projek Projek Berimpak Besar seperti Taman Kekal Pengeluaran Makanan, Zon Industri Akuakultur, Ladang Kontrak dan Pembangunan Usahawan Tani serta *Entry Point Projects* di bawah NKEA. Ini adalah bagi mengawal harga barang makanan seperti sayur, ikan dan daging lembu dan sebagainya supaya tidak melambung naik.

Di bawah projek Taman Kekal Pengeluaran Makanan (TKPM), sebanyak 70 buah TKPM telah dibangunkan dengan keluasan berhasil seluas 2,180 hektar dan telah menghasilkan pengeluaran sebanyak 21,379 tan metrik dengan nilai pengeluaran berjumlah RM26.82 juta. Walau bagaimanapun, Kementerian masih mengimport sayur-sayuran beriklim sejuk khususnya yang tidak begitu sesuai untuk ditanam dalam Negara disebabkan oleh faktor tanah dan iklim yang tidak sesuai.

Projek Zon Industri Akuakultur (ZIA) pula mengeluarkan sebanyak 1.4 juta tan metrik bekalan ikan setahun bagi menampung penggunaan sebanyak 1.4 juta tan metrik setahun. Walau bagaimanapun, Kementerian turut mengeksport sebanyak 300 ribu tan metrik dan mengimport sebanyak 620 ribu tan metrik ikan untuk kegunaan dalam negara.

Sejak 2006 hingga April 2014, Program Ladang Kontrak telah melibatkan pembangunan kawasan seluas 61,989 hektar dengan jumlah peserta seramai 36,514 orang dan hasil pengeluaran sebanyak 2.68 juta tan metrik dengan nilai RM4.861 bilion. Program ini akan diperluaskan dengan sasaran pembangunan 7,500 hektar kawasan tambahan dengan penglibatan 4,500 orang peserta untuk memastikan bekalan sayur-sayuran dan buah-buahan dalam negara mencukupi dan dapat dieksport.

Menyentuh mengenai Pembangunan Usahawan Tani bagi menangani kenaikan harga makanan pula, MOA melalui Lembaga Pemasaran Pertanian Persekutuan (FAMA) telah memperkenalkan Program Agrobazaar K-Shoppe yang diusahakan oleh usahawan pemasar bimbingan FAMA dengan berkonsepkan *showcase* di mana produk perusahaan kecil dan sederhana (PKS) dipamer dan dijual secara terus kepada pengguna. Pengenalan Agrobazaar K-Shoppe ini dapat membantu usahawan memasarkan produk mereka dengan lebih teratur dan terurus dan secara tidak langsung dapat memastikan harga produk lebih kompetitif di pasaran.

Selain daripada itu, kenaikan harga bahan makanan turut ditangani melalui peningkatan bekalan makanan menerusi pelaksanaan *Entry Point Projects* (EPP) di bawah NKEA Pertanian yang telah dilaksanakan sejak dilancarkan pada 2011. Antara program-program yang dilaksanakan adalah galakan pendekatan penanaman padi secara estet di bawah pengurusan tunggal yang berpusat seperti di Muda dan turut direplikasikan di lain-lain kawasan jelapang di bawah EPP Padi. Setakat ini, sebanyak 13,506 hektar tanah di kawasan Muda, Kedah telah berjaya digabungkan, dengan menambah produktiviti hasil padi secara purata daripada 4.71 tan metrik sehektar pada 2011 kepada 6.75 tan metrik hektar hingga awal 2014. Menjelang 2020, seluas 50,000 hektar tanah disasar untuk digabungkan bagi meningkatkan produktiviti kepada 8 tan metrik sehektar.

Program penternakan lembu secara integrasi dalam kawasan tanaman kelapa sawit di bawah EPP Ternakan turut dilaksanakan sejak tahun 2012 dengan objektif untuk meningkatkan jumlah populasi lembu dalam ladang kelapa sawit. Sehingga kini sebanyak 21 ladang telah dipilih di seluruh Negara yang melibatkan 8,630 ekor lembu betina dan 360 ekor lembu pejantan bagi pelaksanaan program ini. Melalui program ini juga, peratus kelahiran keseluruhan populasi lembu telah meningkat daripada 3% pada tahun 2012 kepada 17% pada tahun 2013 dengan peratus

kematian keseluruhan adalah 7.3%. Dijangkakan peratusan kelahiran lembu pada tahun 2014 boleh mencapai 25%.

Selain daripada program-program di atas, Kerajaan juga telah melaksanakan beberapa langkah bagi menjamin pengeluaran makanan di samping mengawal harga bahan pertanian iaitu dengan:

- (i) memperkenalkan Insentif Percukaian bagi menarik penyertaan dan pelaburan sektor swasta ke dalam bidang pertanian di bawah program TKPM, ZIA dan ladang satelit;
- (ii) memperkenal dan mempergiatkan Program Jimat Belanja Dapur (JBD) sebagai strategi jangka pendek dan Skim Pengukuhan Bekalan Ladang Kontrak MOA di Pasar Tani sebagai strategi jangka panjang. Program JBD merupakan satu insentif bagi menangani kenaikan harga barang di pasaran terutama menjelang musim perayaan. Ia merupakan satu mekanisme untuk menangani kenaikan kos sara hidup rakyat melalui jualan komoditi terpilih dengan 5% hingga 30% lebih rendah berbanding dengan pasaran di pasar tani terpilih;
- (iii) melaksanakan Skim Pengukuhan Bekalan Ladang Kontrak MOA di pasar tani yang merupakan skim berbentuk insentif dan galakan yang disediakan untuk kelompok gabungan antara peserta ladang kontrak dengan peserta-peserta pasar tani sedia ada. Skim ini bertujuan meningkatkan pengeluaran dan mengumpulkan hasil pertanian untuk dipasarkan terus kepada pengguna melalui pasar tani dengan sasaran peserta adalah seramai 500 orang;
- (iv) membangunkan Pasar Tani untuk membolehkan bekalan hasil pertanian dibawa terus ke Pasar Tani dan memastikan harga yang berpatutan. Setakat ini terdapat 512 buah Pasar Tani sedia ada di seluruh negara dan sedang dalam perancangan untuk tambah kepada 1,000 buah Pasar Tani dalam tempoh 7 tahun akan datang secara berperingkat;
- (v) mewujudkan Pasar Komuniti dan Karavan (PAKAR) yang mempunyai konsep pemodenan seperti Pasar Tani, Pasar Malam, Pasar Minggu dan Pasar Tamu tetapi dilengkapi dengan kemudahan struktur yang tetap, bagi memastikan kebersihan tapak premis sambil membantu peniaga meningkatkan pendapatan mereka. Petani, nelayan dan penternak boleh menjual terus hasil tanaman, ternakan dan tangkapan di Pasar Komuniti tersebut. Setakat ini 8 buah Pasar Komuniti telah beroperasi dan 3 buah lagi dalam pembinaan, menjadikan 11 buah Pasar Komuniti secara keseluruhan;

- (vi) mewujudkan Agrobazaar Kedai Rakyat (AKR), di mana ketika ini terdapat sebanyak 201 buah AKR dan ia akan ditambah menjadi 500 buah AKR keseluruhannya;
- (vii) mewujudkan Gerai Buah-Buahan Segar (GBBS) di mana setakat ini terdapat 413 buah GBBS di seluruh negara; dan
- (viii) menggalakkan nelayan bersama-sama Persatuan Nelayan Kawasan untuk membuka lebih banyak Pasar Nelayan yang membolehkan pengguna membeli ikan pada harga dan kualiti ikan yang lebih kompetitif di kawasan sekitar pusat pendaratan.

Kementerian juga membenarkan pengimportan komoditi tertentu bertujuan memantau jumlah pengimportan, mengawal sebarang tindakan lambakan komoditi import yang akan menjaskan pendapatan pengusaha-pengusaha tempatan dan juga untuk mengawal pematuhan piawaian / standard yang ditetapkan bagi barang import. Kuota pengimportan bagi produk-produk terpilih akan ditingkatkan pada musim-musim tertentu supaya bekalan hasil pertanian dapat memenuhi permintaan dalam negara. Sebagai contoh, kuota pengimportan kubis bulat pada bulan Januari 2013 ditingkatkan sebanyak 20 peratus berbanding lain-lain bulan bagi menampung permintaan yang tinggi menjelang Sambutan Tahun Baru Cina.